

Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat

Piniarnek aallaaniarnerlu pillugit Inatsisartut inatsisaanni nr. 12, 29. oktober 1999-imeersumi, kingullermik Inatsisartut inatsisaata allanngortinnera pillugu Inatsisartut inatsisaatigut nr. 1, 16. maj 2008-meersumi, § 2, imm. 4, § 8, § 9, imm. 2, § 12, § 13, § 15, imm. 4, § 17, imm. 2 aamma § 18, naapertorlugit aalajangersarneqarput:

Kapitali 1

Atuuffi

§ 1. Kalaallit Nunaanni qilalukkanik qaqortanik (*Delphinapterus leucas*) aamma qilalukkanik qernertanik (*Monodon monoceros*) illersuineq piniarnerlu pillugit nalunaarut.

Kapitali 2

Eqqissisimatitsineq

§ 2. Qilalukkat qaqortat qernertallu Kalaallit Nunaanni tamarmi eqqissisimatitaapput, § 3-mi taaneqartut kisiisa pinnagit.

Imm. 2. Imm. 1 sassanut atuutinngilaq, § 17 naapertorlugu.

Kapitali 3

Pisassiissutinik piniarfinnillu aalajangersaaneq

§ 3. Naalakkersuisut qilalukkanik qaqortanik qernertanillu piniakkamut ataatsimut immikkut ukiumut ataatsimut imaluunniit ukiunut arlalinnut pisassiissutinik aalajangersaassapput. Pisassiissutit aalajangersarneqassapput nunat tamalaat isumaqatigiissutaat, uumassusilinnik misissuisut siunnersuinerat, atuisut ilisimasaat kiisalu Piniarnek pillugu Siunnersuisoqatigiinnik tusarniaasimaneq tunngavigalugit.

Imm. 2. Qilalukkanik qaqortanik qernertanillu piniarnermi ukioq pisassiiffik tassaavoq 1. januaarimiit – 31. decembarimut ullut taaneqartut ilanngullugit.

Imm. 3. Nunap aggorikkaartumik piniakkat killeqarfeqarput aammalu uumasorsiuut ilisimasaanni nutaanerpaani inassuteqaataannilu sumeersisigaallutik.

Imm. 4. Nunap aggornerata killeqarfiusup iluani piniakkanut pisassiissutit, kommunikkaartumik, aqutsivikkaartumik aamma nunaqarfikkaartumik aalajangersaavigineqarsinnaapput.

Imm. 5. Qilalukkanik qaqortanik imaluunniit qilalukkanik qernertanik nunap aggornerata ataatsip killeqarfiata iluani pisassiissutit atunngitsuukkat pisassiissutitut tamarmiusunut nunap aggornerani

pineqartumi ukiup pisassiiffiusup tullianut nuunneqarsinnaapput.

Imm. 6. Qilalugaqatigiiaat nunap aggornerata killeqarfinik nalunaaruteqarneq aammalu Kalaallit Nunaata imartaani piniarfissanik aalajangiinerit tamanut nalunaarutigineqassapput Namminersorlutik Oqartussat nittartagaani www.naalakkersuisut.gl tusagassiorfinnullu nalunaarutigineqarlutik.

Kapitali 4

Tusarniaaneq aamma pisassiissutininik agguaassineq

§ 4. Nunap aggornerisa assigiinngitsut iluini piniakkanut pisassiissutininik agguaassinissaq kommunikaartumik aamma aqutsiveqarfikkaartunut tunngassuteqartut annertussusiat Aalisarnermut, Piniarnermut Nunalerinermullu Naalakkersuisumit, Kalaallit Nunaanni Aalisartut Piniartullu Kattuffiannik, KNAPK, Tapertaralugu Piniartartut Aalisartartullu Kattuffiannik, TPAK aamma KANUKOKA-mik tusarniaareernerup kingornatigut suliarineqassaaq.

Imm. 2. Piniarnek pillugu Siunnersuisoqatigiit pisassiissutininut sinaakkusiussat pillugit tusarniarneqassapput.

§ 5. Aalisarnermut, Piniarnermut Nunalerinermullu Naalakkersuisoq ukiumi pisassiiffiusumi imaluunniit ukiumi pisassiiffiusumi tulliuuttumi kommunimut pisassiissutininik appaasinnaavoq paasineqarpat, qilalukkanik qaqortanik imaluunniit qilalukkanik qernertanik aqutsiveqarfimmi unioqqutitsisumik piniartoqartoq. Uiaq pisarineqartoq qilalukkamik qaqortamik qilalukkamilluunnit qernertamik inersimasumik ataatsimik amerlassusiliinertut atuuppoq.

§ 6. Piniarnermi ukiumoortumik pisassiissutit tusagassiorfinnut nalunaarutit aamma Namminersorlutik Oqartussat nittartagaat www.naalakkersuisut.gl aqutugalugit tamanut saqqummiunneqassapput.

Kapitali 5

Piniarsinnaatitaasut, akuersissutininik tunniussineq agguaassinerlu

§ 7. Nunap aggornerini killiliussap iluani Naalakkersuisut pisassiissutininik aalajangersagaasa iluini, qinnuteqarnerup kingornatigut § 3-imi akuersissutininik normulersukkanik kommunalbestyrelsi tunniussissaaq.

Imm. 2. Akuersissutininik agguaassinermi peqataasinnaajumalluni piffissami qinnuteqaateqarfiusussami aamma piniarnerup nalaani qinnuteqartoq

1) Inuussutissarsiutigalugu piniarnermut allagartamik atuuttumik imaluunniit sunngiffimmi piniarsinnaanermut allagartamik atuuttumik peqassaaq aamma

2) Aqutsiveqarfimmi akuersissutip tunniunneqarfigisaani najugaqartutut inuit nalunaarsorsimaffianni nalunaarsorsimassaaq.

Imm. 3. Akuersissummik tunniussinermiut peqatigitillugu kommunalbestyrelsip nalunaarummi ilanngussap 1-ip assinga akuersissummik pissarsisumut tunniutissavaa.

§ 8. Nalunaarummi matumani aalajangersakkat pineqartut naapertorlugit inuit akuersissutininik pigisaqartut kisimik qilalukkanik qernertanik imaluunniit qilalukkanik qaqortanik pisaqarsinnaapput.

Imm. 2. Akuersissut inummut atiatigut taasamut taamaallaat atuuppoq allanullu tunniunneqarsinnaanani imaluunnit tuniniarneqassanani.

Imm. 3. Akuersissut ataaseq ukiumi pisassiiffiusumit ataatsimit akuersissutip tunniunneqarfiani, sumiiffimmiit qilalukkamik ataatsimik pisaqarnissamut periarfissiivoq.

§ 9. Kommunalbestyrelsi nunaqarfinni ataasiakkaani aqutsisut, najukkanilu aalisartut piniartullu peqatigiiffii isumasioqatigereerlugit kommunip aamma aqutsiveqarfiit qilalukkanik qaqortanik qernertanillu pisassiissutaannik inuussutissarsiutigalugu piniartunut aamma sunngiffimmi piniartartunut agguaassinissaq pillugu piumasaqaatinik, aalajangersaasinnaavoq.

Imm. 2. Sunngiffimmi piniartartut aqutsiviup qilalukkanik qaqortanik qernertanillu pisassiissutaasa 0-10 %-iisa akornanni amerlassuseqartunik pisassinneqarsinnaapput.

§ 10. Kommunalbestyrelsi kommunimi ileqqoreqqusaliaq aqputigalugu ataatsimoorluni piniarnissami pisassiissutit pillugit malittarisassanik aalajangersaasinnaavoq. Ataatsimoorluni piniarnermi pisassiissutitik sippuinnginnissaq qulakkeerneqassaaq, takuuk § 8, imm. 3.

Imm. 2. Ataatsimoorluni piniarnek paasineqassaaq, piniartunit ataatsimoortunit ukunannga inunnit inuussutissarsiutigalugu piniarnermut allagartalinneq, imaluunniit inunnit sunngiffimmi piniarsinnaanermut allagartalinneq imaluunniit piniarsinnaatitaasunit taakkunannga marlunnit peqataaffigineqartumik aamma ataatsimoorluni piniarnissamut akuersissummik tunineqarsimasunit piniarnek ingerlanneqartoq.

Imm. 3. Kommunalbestyrelsi pisassiissutigineqartunik peqqissaartumik nakkutilliissaaq. Pisassiissutigineqartunik atuineq malittareqqissaarneqassaaq piniarnerlu ingerlaannartumik unitsinneqassalluni, kommunimut pisassiissutit imaluunniit aqutsivimmut pisassiissutit tamakkerneqarpata.

Imm. 4. Kommunalbestyrelsip kommunimit pisassiissutigineqartut imaluunniit aqutsiveqarfimmut pisassiissutigineqartut tamakkerlugit pisarineqarpata, Aalisarnermut, Piniarnermut Nunalerinermullu Naalakkersuisoqarfimmut allakkatigut saaffiginnissaq.

§ 11. Kommunalbestyrelsi pisaqarnissamut akuersissutit aaneqarnissaannut piffissamik killiliisinnaavoq.

Imm. 2. Piniartut akuersissummik tunineqarsimasut akuersissummi atuisinnaangitsut imaluunniit atuerusunngitsut, piaarnerpaamik akuersissut atorineqanngitsut akuersissutitik agguaassisusaatitaasumut utertissavaat.

Imm. 3. Akuersissutit piffissaliussatut killiliussap iluani aaneqanngitsut, sumiiffimmi aqutsiviup iluani pisortatigoortumik utaqqisunut allattorsimaffik naapertorlugu agguaateqqinneqarsinnaapput.

Imm. 4. Akuersissutit aaneqanngitsut aamma akuersissutit ukiumi akuersissuteqarfiusumi pisassiissutit sinneruttunik agguaasseqqinnerup nalaani atorineqanngitsortut, pissusissamisoortumik agguaasseqqinnermut atatillugu pisassiissutitut ilanngunneqassapput, tamatumalu kingornatigut siusinnerusukkut akuersissummik piginnittumit atorineqassanatik. Tamatuma kingornatigut taakku kommunip iluani immikkut piniakkanut pisassiissutit aamma kommunip ileqqoreqqusaliaanut tunngatillugu aalajangersakkat naapertorlugit agguaateqqinneqassapput. Agguaasseqqinnermut piffissaliussaq piffissap piniarfiusussap aallartinnginnerani kommunalbestyrelsip nalunaarutigissavaa aamma tamanna akuersissummi takuneqarsinnaassaaq.

Imm. 5. Kommunini aamma sumiiffinni aqutsivinni pineqartuni najukkani aalisartut piniartullu peqatigiiffinik tusarniaareernerup kingornatigut agguaasseqqinneq ingerlanneqassaaq.

Kapitali 6

Piniariaatsit

§ 12. Qilalukkanik qaqortanik qernertanillu piniarnermi taamaallaat qoorortuut akuerisaasut minnerpaamik .30-06 (7,62x63 mm)-mik sulloqqortussusillit atorineqassapput. Qoorortuunik eqittaannartakkanik atuineq inunnut inuussutissarsiutigalugu piniarnermut allagartalinneq.

ajornartitaanngilaq.

Imm. 2. Ajornartinnagu qilalugaq qaqortaq qernertarlunniit toqussutissaanik nangillugu aallaaneqartinnagu naalillugu annaanaveerneqassaaq.

Imm. 3. Qilalukkanik qaqortanik qernertanillu piniarnermut atatillugu taamaallaat ajornartitaanngilaq qassutinik nigartap tamakkerluni iluatungimigut nerutussusianik minnerpaamik 380 mm-inik atuinnissaq, Qaanaap aqutsiveqarfiani kiisalu Tunumi sumiiffinni aqutsiveqarfinni. Qassutit atorneqartut piginnittup aqqanik nalunaaqutserneqarsimassapput, akuttunngitsunillu alakkarneqartarlutik piniarnermilu atorneqareerermik kingornatigut qaqinneqassallutik.

Imm. 4. Aqutsiveqarfinni qilalukkanik qaqortanik imaluunniit qilalukkanik qernertanik piniarnermut atatillugu atorneqarfini, kommunalbestyrelsi qassusersorluni piniarneq pillugu kommunimi ileqqoreqqusamik suliaqassaaq.

Imm. 5. Qilalukkanik qaqortanik aamma qernertanik piniarneq Qimusseriarsuarmi eqqissisimatitami Immikkoortoq 2-mi qajaq atorlugu ingerlanneqassaaq. Qaqortat imaluunniit qernertat aallaaneqartinnagit naalinneqassapput.

§ 13. Timmisartut, qulimiguullit qamutillu motorinik ingerlatillit suugaluartulluunniit qilalukkanik qaqortanik qernertanillu piniarnermut atatillugu imaluunniit piniarfimmut tassanngaannillu angallatitut atoqqusaanngillat, taamaattoq takuuk § 17, imm. 5.

§ 14. Taamaallaat angallatit, angallatip angissusianut uppersarsaat malillugu 14 meterinik takissuseq tamakkerlugu (t.t.) takitigisut taassuminngaluunniit mikinerusut, qilalukkanik qaqortanik qernertanilluunniit piniarnermut atatillugu atorneqassapput. Angallatini GR-normulinni 14 meterinik (t.t.) takissusillit taassuminngaluunniit mikinerusuni aalajangersimasumik inuttat angallammik piginnittoq sinnerlugu piniarsinnaapput.

Imm. 2. Qilalukkanik qaqortanik qernertanilluunniit piniarnermut atatillugu angallatinik imm. 1-imi taaneqartuniit allanik atuinnissaq inerteqqutaavoq.

Imm. 3. "Angallatinik allanik" paasineqassaaq angallatit qanorluunniit angissuseqartut, kalittaatitut imaluunniit, imm. 1 malillugu angallatinik akuerisaasunit qilalukkanik qaqortanik qernertanilluunniit pisanut atatillugu assartuutitut atorneqartut.

Ungusineq

§ 15. Ungusilluni piniarnerit tamarmik soorlu sinerissamut patugullugit aninaveersitsineq imaluunniit sinerissamut imaluunniit sikup sinaavanut tatisillugit assiinerit inerteqqutaapput.

Kapitali 7

Naalakkersuisoqarfimmit akuerineqareernerup kingornatigut toqutsineq

§ 16. Aalisarnermut, Piniarnermut Nunalerinermullu Naalakkersuisoqarfimmit akuerineqareernikkut qilalukkanik qaqortanik qernertanilluunniit annertuumik ikilernerqarsimasunik, qilalukkanik qaqortanik qernertanilluunniit aalisarnermut atatillugu qassutinut imaluunniit aalisarnermut atortunut allanut nuiguussimasunik toqutsisoqarsinnaavoq.

Imm. 2. Qilalukkamik qaqortamik qernertanilluunniit akuerisaasumik pisaqareernerup kingunerisaanik paasineqarpat pisaq nappaammik imaluunniit assigisaanik pissuteqartumik inunnut nerisassatut naleqquttuunngitsoq, tamatuma kingunerisaanik Aalisarnermut, Piniarnermut Nunalerinermullu Naalakkersuisoqarfiup pisap toqunneqartutut isigineqarnera akuerisinnaavaa. Akuersissut atorneqarsimappat taanna atuutiinnassaaq.

Imm. 3. Imm. 1 naapertorlugu piniakkat toqunneqartut najukkami innuttaasunut

agguaanneqarsinnaapput, pisaq nerisassatut naleqquppat. Saarngit aamma kigutit (tuugaaq) Naalakkersuisoqarfiup pigisarai, toqunneqarneratalu kingornatigut kingusinnerpaamik ullut 14-t qaangiunneranni uunga Postboks 269, 3900 Nuuk, nassiunneqassallutik.

Kapitali 8

Sassat

§ 17. Sassanik naammattuuisoqarpat tamanna najukkami oqartussaasumit Aalisarnermut, Piniarnermut Nunalerinermullu Naalakkersuisoqarfimmut uppersarnerqassaaq. Naalakkersuisoqarfik sassinerup aallartinneqarnissaanut akuersissaaq, Naalakkersuisoqarfiup nalilerpagu qilalukkat aniguisinnaanerit ilimanangitsoq. Akuersissut kommunalbestyrelsimut imaluunniit sumiiffimmi aqutsiviusumi najukkani oqartussaasunut nalunaarutigineqassaaq, tamatuma kinguinngua nunaqarfiit illoqarfiillu pineqartut ilisimatinneqassallutik.

Imm. 2. Sassat ima paasineqassaput qilalukkat qaqqortat qernertalluunniit sikumi ammalatami mattussaasimasut taamaallutillu uumallutik nammineerlutik aniguisinnaangitsut.

Imm. 3. Kikkulluunniit inuussutissarsiutigalugu piniarnermut imaluunniit sunngiffimmi piniarsinnaanermut atuuttumik allagartallit sassinermit peqataasinnaapput. Sassinermit pisat piniartut ataasiakkaat qilalukkanik qaqqortanik qernertanilluunniit pisassaannit imaluunniit sumiiffimmi aqutsiviusumi pisassanit ilaatinneqassanngillat.

Imm. 4. Sassinermit pisat ima amerlatigisinnaapput kingusinnerpaamik sassinerup naammassinerata kingornatigut pisat tamakkerlutik qularnaatsumik qimussimik angallanneqarsinnaassallutik.

Imm. 5. Taamaattoorli pisuni immikkut ittuni silap sikullu pissusii pissutigalugit pisat tuaviortumik immikkullu ittumik angerlaassorneqartariaqalersillugit sassivimmiit qamuteralaat angerlaassuinermit atorineqarnissaannut kommunalbestyrelsi immikkut akuersissuteqarsinnaavoq.

§ 18. Neqit, mattaat orsullu nalunaaqutsikkat qilalukkallu pitutat piginnittui akuersitinnagit nikisinneqassanngillat, kommunalbestyrelsi imaluunniit sumiiffimmi aqutsiviusumi najukkami oqartussaasut sila pissutigalugu pisat angerlaannissaannut tunngatillugu, piffissamik aalajangiisimanngippata piffissaliussarlu taanna eqqortinneqarsimanngippat.

Kapitali 9

Pilanneq

§ 19. Qilalugaq nunamut sikumulluunniit qaqiinnavillugu pilanneq aallartinneqassaaq. Nerisassartai atorineqarsinnaasullu allat tamarmik angerlaanneqarlutilluunniit qimatulineqassapput. Pilaffiusimasoq perlukuierneqarsimassaaq.

Imm. 2. Iliveqqiviit najukkami piniarnermut aalisarnermullu nakkutilliisumut nalunaarutigineqassapput.

Imm. 3. Taamaallaat angallatit, angallatip angissusianut tamakkiisumut uppersarsaat malillugu 14 meterinik t.t.-mik takissusillit taannaluunniit inorlugu angissusillit angallatip nammineq pisaanik pilaffigineqarsinnaapput.

Kapitali 10

Saniatigut pisat aamma pissaaneq

§ 20. Qilalukkanik qaqqortanik imaluunniit qilalukkanik qernertanik saniatigut pisat kommunip imaluunniit sumiiffiup aqutsiviusup pisassaannit ilanngaaticineqassapput.

Imm. 2. Qilalukkanik qaqortanik qernertanilluunniit pissaasoqartillugu sapinngisamik piaarnerpaamik piniarnermik aalisarnermillu nakkutilliisoq tamanna pillugu attavigineqassaaq aamma pissaaneq kommunimi imaluunniit sumiiffimmi aqutsiviusumi pisassiissutinit ilanngaatineqassaaq.

Kapitali 11

Tunisinermi piumasaqaatit

§ 21. Qilalukkat qaqortat qernertallu pisat tunineqassanngillat kommunimi imaluunniit nunaqarfimmi allaffik akuersisummik naqissusiinikkut ullulerlugu pisamik nalunaarsuereertinnagu, taamaattoq takuuk imm. 3.

Imm. 2. Pisanik taakkualuunniit ilaannik tunisisoqassanngilaq pisisoqaraniluunniit akuersisummik piginnittoq imaluunniit akuersisummik piginnittut akuersissutip assilineranik naqissusiitseqqaartinnagit, tunisinermut atatillugu qinnuiginninneq malillugu takutissinnaasaminnik. Assilinerani takuneqarsinnaassaaq pisap kommunimi oqartussaasumit nalunaarsorneqarsimanera.

Imm. 3. Taamaattoq kommunip allaffia nunaqarfimmiluunniit allaffiup ammanerisa avataatigut tuniniaaneq aallartinneqarsinnaavoq, allaffik ammarniariartoq nalunaarsuisoqarsinnaappat.

Imm. 4. Qilalukkat qaqortat qernertalluunniit unioqutitsinikkut pisineqarsimasut mattaannik, neqaannik aamma kigutaannik (tuugaavinik) pisineq imaluunniit pissarsineq inerteqqutaavoq.

Tunisineq

§ 22. Angallatit qilalukkat qaqortat qernertallu neqaannik, orsuinik mattaannillu tunitsivittut atorineqassanngillat.

Imm. 2. Tunitsivinnut akuerisaasunut inuussutissarsiutigalugu piniartut, inuussutissarsiutigalugu piniarnermut atuuttumik allagartallit akuersisumillu naqissusersimasumik takutitsisinnaasut kisimik pisanik tunisisinnaapput, takuuk § 21, imm. 1 aamma 2.

Imm. 3. Naalakkersuisut kommuninut tunisinissamut pisassiissutit aalajangersakkat iluini pisassiissutinik aalajangersaasinnaapput, piniarnermut atatillugu kommuninut pisassiissutinik tunineqarsimasunut.

Imm. 4. Tunisinissamut atatillugu pisassiissutinik aalajangersaasoqarsimatillugu, tunitsiviit ullormut tunisat annertussusiat pillugu paasissutissanik Aalisarnermut, Piniarnermut Nunalerinermullu Naalakkersuisoqarfimmut nassitsissapput, tunisinerup akuerisaanerata atuunnerani.

Imm. 5. Aalisarnermut, Piniarnermut Nunalerinermullu Naalakkersuisoqarfiup kommunimi pineqartumi imaluunniit sumiiffimmi aqutsiviusumi tunitsivimmut tunisinerup qaqugu uninnissaa nalunaarutigissavaa.

Tuniniaaneq

§ 23. Najukkami kalaalimineerniarfinni allatullu tuniniaanerni inuussutissarsiutigalugu piniartunit atuuttumik piniarnermut allagartalinnit pisaqarnissamullu akuersisummik naqissusikkamik peqartunit taamaallaat ingerlanneqarsinnaavoq, takuuk § 21, imm. 1 aamma 2, imaluunniit inunnit tamatumunnga piginnaatitaasunit piumasaqarneq naapertorlugu uppersaammik takutitsisinnaasunit.

Imm. 2. Toqqaannartumik suliffinnut, suliffeqarfinnut neriniartarfinnulluunniit tunisineq inuussutissarsiutigalugu piniartunit atuuttumik inuussutissarsiutigalugu piniarnermut allagartalinnit pisaqarnissamullu akuersisummik naqissusikkamik peqartunit taamaallaat ingerlanneqarsinnaavoq, takuuk § 21, imm. 1 aamma 2, imaluunniit inunnit tamatumunnga piginnaatitaasunit piumasaqarneq naapertorlugu uppersaammik takutitsisinnaasunit.

Imm. 3. Suliffiit, suliffeqarfiit neriniartarfillu imm. 2-mi taaneqartut qilalukkap qaqortap qernertalluunniit neqaa, orsua mattaaluunniit inuussutissarsiutigalugu piniartunit atuuttumik piniarnermut allagartalinnit pisaqarnissamut akuersisummik naqissusikkamik peqartunit, pisiaasimanera uppersarsassavaat, takuuk § 21, imm. 1 aamma 2.

Imm. 4. Imm. 3 naapertorlugu uppersarsaat pineqartoq tassaavoq, pisinermut uppersarsaat atsiorsimasooq inuussutissarsiutigalugu piniarnermut allagartap piniarsinnaanermullu akuersissutip naqissusikkap assilineranik ilalik.

Imm. 5. Taamaallaat inuit inuussutissarsiutigalugu piniarnermut allagartamik atuuttumik aamma akuersisummik naqissusikkamik peqartut, takuuk § 21, imm. 1 aamma 2, qilalukkat qernertat tuugaavinik imaluunniit qilalukkap qaqortap kigutaanik tunisisinnaapput. Allagartaq akuersissutip normutalik tuugaarmut ilivitsumut allunaasartalerlugu ikkunneqassaaq.

Kapitali 12

Nalunaaruteqarnek nakkutilliinerlu

§ 24. Qilalukkanik qaqortanik qernertanillu piset, saniatigut piset pissatallu sapinngisamik piaarnerpaamik kommunimut angerlarsimaffigisamut, illoqarfigisamut imaluunniit nunaqarfimmi allaffimmut nalunaarutigineqassapput. Nalunaaruteqarnek piniartumit pisaqartumit namminermit isumagineqassaaq, sassinermili piset, inuussutissarsiutigalugu piniartut eqqarsaatigalugit najukkami Aalisartut Piniartullu Peqatigiiffiannit aamma sunngiffimmi piniartartut pineqartillugit kommunalbestyrelsimit/nunaqarfinni aqutsisunit nalunaarutigineqassallutik. Ataatsimoorluni piniarnermi piset nalunaarutigineqassapput taamaallaat ataatsimoorluni piniarnermut atatillugu aqutsisussatut toqqarneqarsimasumit.

Imm. 2. Nalunaaruteqarnermi immersugassaq nalunaarummut ilanngussap 1-ip assinga atorneqassaaq. Immersugassat kommunip allaffiani nunaqarfimmiluunniit kommunip allaffiani pineqarsinnaapput. Immersugassat aamma aaneqarsinnaapput Namminersorlutik Oqartussat nittartagaanni uani: www.naalakkersuisut.gl. Qilalukkanut pisanut pissatanullu ataasiakkaanut tamanut immersuiffissaq ataaseq immersorneqassaaq, taamaattorli sassinermi piset tamarmik immersuiffissami ataatsimi nalunaarutigineqassallutik. Akuersissutip kommunimut naqissusikkap assilineranik pisanik nalunaarutiginninnermi ilanngunneqassaaq.

Imm. 3. Aammattaaq qilalukkanik qaqortanik qernertanillu piset tamarmik *Piniarneq*-mi pisanik nalunaarsuiffimmi nalunaarutigineqassapput.

Imm. 4. Kommunilbestyrelsip nalunaarummi ilanngussami 3-mi immersuiffiit kiisalu § 21, imm. 1 naapertorlugu akuersissutip naqissusikkat assingi tiguneqarnerisa kinguinngua piaarnerpaamik Aalisarnermut, Piniarnermut Nunalerinermullu Naalakkersuisoqarfimmut nassutissavai.

§ 25. Inuussutissarsiutigalugu piniarnermut allagartaq atuuttoq imaluunniit sunngiffimmi piniarsinnaanermut allagartaq atuuttoq aamma akuersissut imaluunniit tunisisinnaanermut akuersissut sukkulluunniit politiit, piniarnermik aalisarnermillu nakkutilliisut tamatumunngalu piginnaatitaasut piumasaqarnerisigut tamatigut takutinneqartassaaq.

Kapitali 13

Misissugassat nalunaaqutsersuinerlu

§ 26. Kinaluunniit qilalukkamik qaqortamik qernertamilluunniit pisaqarsimasoq, pisussaatitaasinnaavoq pisap mattaanik, neqaanik anginngitsumik imaluunniit kigutaata ilaanik misissugassanik kommunip allaffianut tunniussinissamik, tassani pisap suunera, ulloq sumilu pisaqarsimanera pillugu ilisimatitsissutigalugu. Misissugassat Pinngortitaleriffiup plastikkimik puussarititamat tunniunneqarsimasumut asiunaveersaammik imerpalasortalimmut imaluunniit allakkap puuanut ikineqassapput.

Imm. 2. Misissugassat paasissutissallu tunniunneqartut tigunerisa kingornatigut piaartumik kommunip allaffiata Pinngortitaleriffimmut, Box 570, 3900 Nuuk, nassutissavai.

§ 27. Misissugassanik tigusineq, nalunaaqutserisueq suliallu allat qilalukkanik uumasunik attuumassuteqartut taamaallaat Pinngortitaleriffimmit ingerlanneqarsinnaapput. Allat Aalisarnermut, Piniarnermut Nunalerinermullu Naalakkersuisoqarfimmut akuersissuteqarnissamik qinnuteqaqqaassapput.

Kapitali 14

Immikkut akuersissuteqarneq

§ 28. Aalisarnermut, Piniarnermut Nunalerinermullu Naalakkersuisoqarfik ilisimatusarnermut atugassanik nalunaarummi matumani aalajangersakkanik immikkut saneqqutsisoqarnissaanut akuersissuteqarsinnaavoq.

Kapitel 15

Pineqaatissiinerit

§ 29. § 2-mik, § 8-mik, §§-inik 12-23 aamma § 25-imik unioqqutitsinerit akiliisitsinermik aamma pisamik arsaarinnissuteqarnermik Kalaallit Nunaanni pinerluttulerinermik inatsit malillugu pineqaatissiisutaasinnaapput.

Imm. 2. Nalunaarut malillugu kommunimi ileqqoreqqusanik atortussanngortinneqarsimasunik unioqqutitsisoqartillugu akiliisitsinermik pisamillu arsaarinnermik pineqaatissiisoqarsinnaavoq.

Kapitali 16

Atuutilerina

§ 30. Nalunaarut 15. januar 2016 atuutilerpoq. Peqatigitillugu Qilalukkanik qaqortanik qernertanillu piniarnek pillugu Namminersorlutik Oqartussat nalunaarutaat nr. 7, 29. marts 2011-meersoq atorunnaarpoq. Taamaakkaluartoq kommunip ileqqoreqqusai nalunaarut malillugu atulersinneqartut allanngortinneqarnissamik atorunnaarsinneqarnissamilluunniit tungaannut atuutiinnarallassapput.

Namminersorlutik Oqartussat, ulloq 15. januar 2016

Karl-Kristian Kruse

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut